

## 開放文學 – 神鬼仙俠 – 天妃娘娘傳 第二十四回 林二郎奏凱回朝

卻說二將即日離了弱水，不數日到關。探哨報知，李將軍忙差部下出關迎接。二將入關與李，林相見，愧恥不已。李將軍曰：「前日之敗，非番之力，亦非戰之罪也。偶中其術，縱有知力，無所用之。今日成功，一賴國家之福，二則真人冥中嘿相之功，如不佞者，不過出則告戒，入則受成而已，他亦何能之有。」二郎曰：「國家不得已出軍，勞民傷財。今邊事稍定，兵士久處於此，一恐國內之虛耗，二恐久役者之怨嗟，此非萬全之策也。可議留守之計，擇日班師入朝。」眾議留都指揮周全鎮守大同門，分撥兵馬，各處守備去訖。林二郎同諸將告禱於真人，即日拔寨，奏凱回朝。但見天氣清明，和風拂拂，兵馬旌旗，濟濟載道，強兵良將，笑語喁喁，不數日到了京師。林與李乃上裏稱賀，表曰：

伏以上古以好生為德，祥無取於佳兵，王者以強本為威，每戒申於勤遠。豈雲內耗，以弭外憂。然而患有切於震鄰，計莫先於篤祐。則雖以周文之聖，不輟遏密之師；以殷高之明，尚申鬼方之伐。蓋易垂禦寇，詩詠簡書，要在以兵止兵，非雲亂而易亂。況咸賓之世，六合為家。則有道之長，四夷是守。頃者蠱爾西番，藉妖大同為寇，踐踏我疆宇，羈縻我大將，罪則大矣，惡斯極矣。臣等全仗天威，深憑國福，橫玉弩以高臨，縱金鉞而直進。白刃交而寶刀折，旬始無芒；赤堇揮而孤劍搖，櫓槍失色。射元鏃發，擐甲魁殲。賊知天怒難乾，王師無敵，深苦全師之俱沒，乃自俯首而乞和。彼既獻地效誠，我且止戈為武。然詞卑者進，法無恃其不來；師勝則驕，慮須防於更舉。伏願皇帝陛下，留心邊事，戒飭守臣。乃合西北之勢，繇連犄角之形。則可以鞏鴻圖於有永，保無事於萬年。臣等不勝激切屏營之至，謹奉表稱賀以聞。

表上，帝覽畢，召見二郎，獎諭之曰：「大同之役，卿之功可為最矣！」二郎遜謝不敢當。於是大封徂徵功臣，論功升賞有差。群臣作賀畢，乃具太牢，設祭真人於南郊。光祿寺大設筵宴，為二郎與諸將賀功，賜以弓矢。真人護國大功，另日傳旨褒封。君臣燕喜，帝乃歌彤弓之詩：

其一曰彤弓召兮，受言藏之。我有嘉賓，中心貺之。鐘鼓既設，一朝饗之。

其二曰彤弓召兮，受言載之。我有嘉賓，中心喜之。鐘鼓既設，一朝右之。

其三曰彤弓召兮，受言曩之。我有嘉賓，中心好之。鐘鼓既設，一朝酬之。

歌罷，明帝親執二郎之手，而謂之曰：「攻克戰勝之功少，不殺而服之功大，故今日求良將於戰陳之中有，求真人之功於戰陳之中無，指日傳封。今日之宴，聊為先生解戰袍矣，未足以盡寡人之心也。」二郎同李將軍九頓拜謝，歌天保以答之：

其一天保定爾，亦孔之固。俾爾單厚，何福不除。俾爾多益，以莫不庶。

其二天保定爾，俾爾戩谷。罄無不宜，受天百祿。降爾遐福，維日不足。

歌罷，與宴諸臣各起舉觴稱賀，為之和歌嘉魚：

其一南有嘉魚，蒸然罩罩。君子有酒，嘉賓式燕以樂。

其二南有嘉魚，蒸然訕訕。君子有酒，嘉賓式燕以衍。

其三南有樛木，甘瓠累之。君子有酒，嘉賓式燕綏之。

大眾賡歌一闋，明帝龍顏大悅，群臣百拜，山呼稱謝，君臣相悅。為之評曰：

漢自武帝窮兵，至於末年，海內虛耗，尋亦厭之，武事弛而不用。至於明帝，昇平日久，安而忘危，武備不修，弱水得以乘間而竊發，虜其二將，傷漢世數百年之神氣。向非真人建護國之功，則幾乎犬羊薦食中國，腥羶染我衣服，漢之為漢，始哉岌岌乎，安得有君臣賡歌之相悅哉。然則真人之為神，豈可與別神一評而論哉！其功固不偉與？其報封固不宜與？